

四庫全書

子部

欽定四庫全書

子部

天中記卷二十八

詳校官中書臣李彤

主事臣祁韻士覆勘

總校官候補中允臣王燕緒

校對官編修臣王天祿

謄錄監生臣葉世倬

欽定四庫全書

天中記卷二十八

明 陳耀文 撰

假譎

御僮齊襄公即位憎公孫無知收其祿無知不說殺襄  
公公子糾走魯公子小白奔莒既而國殺無知未有君  
公子糾與公子小白皆歸俱至爭先入公家管仲扞弓  
射公子小白中鉤鮑叔御公子小白僮管子以為小白

死告公子糾曰安之公子小白已死矣鮑叔因疾驅先入故公子小白得以為君鮑叔之智應射而令公子小白僵也其智若鐵矢也

呂責卒

遺書叔向之讒萇弘也為書曰萇弘謂叔向曰子為我謂晉君所與君期者時可矣何不亟以兵來因佯遺其書周君之庭而急去行周以萇弘為賣周也乃誅萇弘而殺之

韓子

叔向之殺萇弘也數見萇弘於周因佯遺書

曰萇弘謂叔向曰子起晉國之兵以攻周吾廢劉氏而

立單氏劉氏請之君曰此莢弘也乃殺之

說苑

設壇鄭桓公將欲襲鄆先問鄆之辨智果敢之士書其名姓擇鄆之良臣而與之為官爵之名而書之因為設壇於門外而埋之釁之以玃若盟狀鄆君以為內難也盡殺其良臣桓公因襲之遂取鄆

上

獻珥齊王夫人死有七孺子皆近薛公欲知王所欲立乃獻七珥美其一明日視珥所在勸王立為夫夫人

國策

吞珠張丑為質於燕燕王欲殺之走且出境境吏得丑

丑曰燕王所為將殺我者人有言我有寶珠也王欲得之今我已亡之矣而燕王不我信今子且致我我且言子之奪我珠而吞之燕王必當殺子剗子腹及子之腸矣夫欲得之君不可說以利吾要且死子腸亦且寸絕境吏恐而赦之

燕策

不死藥有獻不死之藥於荆王者謁者操以入中射之士問曰可食乎曰可因奪而食之王怒使人殺中射之士中射之士使人說王曰臣問謁者謁者曰可食臣故

食之是臣無罪而罪在謁者也且客獻不死之藥臣食之而王殺之是死藥也王殺無罪之臣而明人之欺王

王乃不殺

楚策

衆辱之爰盜常引大體忼慨宦者趙談以數幸常害盜盜患之兄子種為常侍騎諫盜曰君衆辱之後雖惡君上不復信於是上朝東宮趙談駮馬盜伏車前曰臣聞天子所以共六尺輿者皆天下豪英今漢雖乏人陛下獨奈何與刀鋸之餘共載於是上笑下趙談泣下車

漢書

帳中鼓箏呂布詣袁紹紹患布欲殺之遣三十六兵被鎧迎布使著帳邊卧布知之使於帳中鼓箏諸兵卧布

出帳去兵不覺也

英雄記

人從天下時有一道士頗能治病從中國來欺人言我數百歲立知其誑後會衆坐立謂所親曰欲知此公年否所親曰善忽有人從天上下舉座矚目良久集地著朱衣進賢冠入至道士前前曰天帝詔問公之定年幾



許而欺誑百姓道士大怖下床長跪答曰無狀寔年七十三玄因撫手大笑忽然失朱衣所在道士大慙遂不

知所之

神仙傳

鞭拂晉元帝叔父東安王繇為成都王穎所害懼禍及謀出奔其夜月明禁衛甚嚴不能得去有頃天暴風雨晦冥游者散帝乘間得脫至河陽為津吏所止從者宗典後至以馬鞭拂之謂曰舍長官禁貴人而汝亦被駐

耶因大笑由是被釋

晉中興書

偽醉溫嶠知王敦不可復諫乃潛謀滅之先夙夜綜其  
府事而附其欲錢鳳敦所信也嶠謂人曰錢世儀精神  
滿腹嶠素有知人之稱鳳聞而悅之結好於嶠會丹陽  
尹闕嶠說敦曰京尹輩穀喉舌宜得文武兼能之公宜  
自選其才敦然之問嶠誰可作者嶠曰愚謂錢鳳可用  
然裁之在公敦思惟良久無復勝君嶠即舌辭敦不從  
表補丹陽君猶懼錢鳳為之奸謀因敦置酒與嶠別嶠  
曰違離字下情戀不已願自起行酒以展岐路之心行

酒至鳳未及飲嶠因偽醉以手扳擊鳳幘為之墜作色  
曰錢鳳何人溫太真行酒而敢不飲鳳不悅敦以為醉  
兩釋之明日鳳曰嶠與朝廷甚密未必可信或懷反噬  
宜更思之敦曰太真昨醉小加聲色豈得以此便相讒  
貳由是鳳謀不行而得還都

上

醉眠王允之年在總角敦深知之謂為似已入則共寢  
嘗夜飲辭曰醉先眠敦將錢鳳計逆允之悉聞慮敦或  
疑於眠處大吐敦果照視見眠吐中不復疑之

上

嫁女王文度弟阿智惡乃不翅當年長而無人與婚孫  
興公有一女亦僻錯又無嫁娶理因詣文度求見阿智  
既見便陽言此定可殊不如人所傳那得至今未有婚  
處我有一女乃不惡但吾寒士不宜與卿計欲令阿智  
娶之丈度欣然而啓藍田云興公向來忽言欲與阿智  
婚藍田驚喜既成婚女之頑囂欲過阿智方知興公之

詐

世說

引神為誓齊王敬則為豎陽令縣有一部劫逃入山中

為民患敬則遣人致意刼帥令出首當相申論郭下廟  
神甚酷烈百姓信之敬則引神為誓必不相負刼帥既  
出敬則於廟中設酒會刼帥於坐收縛之曰吾啟神若  
負誓還神十牛今不得違誓即殺十牛解神遂斬諸刼  
百姓悅之

市史

夜讀史范雲齊建元初竟陵王子良為會稽太守雲為  
主簿王未之知後尅日登秦望山乃命雲雲以山上有  
秦始皇刻石此文三句一韻人多作兩句讀之並不得

韻又皆大篆人多不識乃夜取史記讀之令上口明日  
登山子良命賓僚讀之皆茫然不識末問雲雲曰下官  
嘗讀史記見此刻石文進乃讀之如派子良大悅以為  
上賓自是寵冠府朝

上

生太子永安三年逆賊爾朱兆囚莊帝於寺時太原王  
位極心驕功高意侈與奪臧否肆意帝恐謂左右曰朕  
寧作高貴卿公死不作漢獻帝生乃請計于城陽王徽  
徽曰以生太子為辭榮必入朝因以斃之莊帝曰后懷

孕於十月今始九月可爾已否徽曰婦生產子有延月  
者有少月者不足為怪帝納其謀遂唱生太子遣徽特  
至太原王第告云皇儲誕育值榮與上黨王天穆博戲  
徽脫榮帽懼舞盤旋徽素大度量喜怒不形於色遶殿  
內外懽呼榮遂信之與穆並入朝莊帝聞榮來不覺失  
色中書舍人溫子升曰陛下色變帝連索酒飲之然後  
行事榮穆既誅拜徽太師司馬

洛陽伽  
藍記

不言爾朱兆入洛陽擒莊帝崩于晉陽建明二年長廣

王從晉陽赴京師至郭外世隆以長廣本枝疎遠政行  
無聞逼禪與廣陵王恭是莊帝從父兄也正光中為黃  
門侍郎見元德秉權政歸近習遂佯啞不語不預世事  
永安中遁於上洛山中州刺史泉企執而送之莊帝疑  
恭姦詐夜遣人盜掠衣物復拔刀劒欲殺之恭張口以  
手指舌竟乃不言莊帝信其真患於令歸第恭常住龍  
華寺上至是世隆將謀廢立恐實不語乃令王所親申  
其意且兼迫脅王遂答曰天何言哉魏紀於是即皇帝位



改號曰普泰黃門侍郎邢子才為赦文敘述莊帝枉殺  
太原王之狀廣陵王曰永安手翦強臣非為失德直以  
天未厭亂逢成濟之禍謂左右將詔來朕自作之直言  
門下朕以寡德運屬樂推思與億兆同茲大慶肆眚之  
科一依恒式廣陵杜口八載至是始言海內庶士咸稱

聖君

伽藍記

易衣尔朱敞字乾羅榮之族子也父彥伯齊神武韓陵  
之捷盡誅爾朱氏敞小隨母養於宮中及年十二自竇

而走至於大街見童兒羣戲者敝解所著綺羅金翠之服易衣而遁追騎尋至初不識敝便執綺衣兒比究問知非會日已暮由是得免

隋書

犀板換竹齊文襄疑文宣佯愚慮其有後變將陰圖之以問崔暹暹曰嘗與二郎俱在行位試以手板拍其背而不瞋乃將犀手板換暹竹者自揩拭而翫視之以是知其實癡不足慮也帝既鎖暹責其往昔打背暹自陳所對文襄之言明已功以贖死帝悟曰我免禍乃暹之

力釋而勞之

北史

龍東宇文泰與侯景合戰泰馬中流矢驚逸遂失所之  
泰墮地東魏兵追及之左右皆散李穆下馬以策擊泰  
罵之曰龍東軍士爾曹主何在而獨留此追者不疑因  
以馬授泰與之俱逸

上

觀射瞻天元稹便騎射為南豫州刺史太胡山蠻時時  
鈔掠前後守牧多羈縻而已稹乃設畫召新蔡裏城蠻  
魁三十餘人鎮盛武裝於州西為置酒使之觀射先遣

左右能射者二十餘人，積自發數箭，皆中。然後命左右以次而射，先出一囚犯死罪者，使服軍衣，亦參射。限命射不中，積即責而斬之。蠻魁等相視股栗，又預教右右取死囚十人，皆著蠻衣，云是鈔賊。積乃臨坐，偽舉目瞻天，微有風動。積謂蠻曰：「風氣少暴，似有鈔賊入境，不過十人，當在西南五十里許。」即命騎追掩，果縛送十人。積告諸蠻曰：「爾鄉里作賊如此，合死以不蠻等皆叩頭曰：『合萬死，積即斬之。』乃遣蠻還。諸蠻大服，自是境無暴掠。」

親書

五君詠張說謫岳州常鬱鬱不樂時宰以說機辨才畧  
互相排擯蘇頲方大用說與瓌善說因為五君詠致書  
封其詩以貽頲誠其使曰當候忌日近暮送之使者近  
暮吊客至多說先公僚舊頲覽詩嗚咽流涕翌日上對  
大陳說忠正蹇諤人望所屬不宜淪滯遐方上因降璽  
書勞問俄遷荊州長史由是陸象先韋嗣立張庭珪賈  
曾皆以譴逐歲久因加甄叙頲以父之執友事之甚謹

欽定四庫全書

天中記  
卷二十八

十

唐詩  
紀事  
詩曰淒涼丞相府餘慶在玄城

單騎入敵憲宗時戎羯亂華詔下南梁起甲士三千人  
令赴闕下將起師人作叛逐其帥因團集拒命者歲餘  
憲宗深以為患京兆尹溫造請以騎往至其界梁人見  
止一儒生皆相賀無患及至但宣召敕安存一無所問  
然梁帥負過出入者皆不捨器仗溫亦不誠之他日毬  
場中設樂三軍併赴令於長廊下就食坐筵前臨堦南  
北兩行設長索二條令軍人各於面前索上掛其刀劍

而食酒至鼓噪一聲兩頭齊力抨舉其索則刀劍去地  
三丈餘矣軍人大亂無以施其勇然後闔戶而斬之南

梁人自爾累世不敢復叛

王氏  
見聞

佛汧汧州相國寺言佛有汧流節度使劉元佐遽命駕

自持金帛以施日中其妻亦至明日復起齋場由是將

吏商賈奔走道路惟恐輸貨不及因令官為簿書以籍

所入十日乃閉寺曰佛汧止矣得錢巨萬以贍軍資

國史

補

欽定四庫全書

大中記  
卷二十八

十一

匿名王鐸為淮南節度使嘗聽理有遺匿名書于前者  
左右取以授鐸鐸納之鞞中鞞中先有他書以雜之及  
吏問鐸採取他書焚之人言其所匿者焚也既歸省其  
所告者異日乃以他微事連其所告者同窮拘驗之以

謫衆下吏以為神明

舊唐

倉米定價令狐楚除守兗州境方旱米價甚高遣吏至  
公署問米價幾何州有幾倉問訖屈指獨語曰舊價若  
千四倉各出米若干以若干定價糴則可以賑救矣左



右聽之流語遍郡中富人競發所畜物價方平人心欣

然得稔

芝田錄

咀物交談張濬唐昭宗朝親統扈駕六師往討太原遂致失律陷其副師侍郎孫揆尋謀班師路由平陽牧守姓張即蒲帥王珂之大校珂變詐難測復慮軍旅經過落其詭計濬乃先數程而行泊于平陽之傳舍六軍相次由陰地關而進濬深忌晉牧及張郊迎既駐郵亭濬令張使君升廳茶酒設食留至張燈乃許辭去自旦及

暮不交一言口中咀少物遙觀一如交談之狀珂性多疑動有警察時偵事者已密報之珂果疑召張問之曰相國與爾自旦至暮所話何對云並不交言王殊不信謂其不誠戮之六師乃假途歸京了無纖慮后判邦計諸道各致綺紈之類並不受之乃命專人面付之曰爾述吾意以此改充軍行所費之物鍋幕布槽啖馬藥土產所共之物咸請備之於是諸藩欣然奉之以至軍行十萬所需無闕朱溫深忌之令刺客殺之長長水莊上

王堂  
問話

芻為人李克用遣人入魏博覘云有旗幟來往晉王曰  
劉鄩一步一計更令探審果縛芻縛旗縛旗于上以驢  
負之循堞而行鄩軍已去二日矣

北夢  
瑣言

焚僧李抱貞鎮潞州軍資匱闕計無所出有老僧大為  
郡人信服抱貞因請之曰假和尚之道以濟軍中可乎  
僧曰無不可抱貞曰但言擇日鞠場焚身某當於便宅  
鑿一地道通連俟火作即潛以相出僧喜從之遂陳狀

聲言抱貞命於鞠場積薪貯油因為七日道場晝夜香  
燈梵唄雜作抱貞亦引僧入地道使之不疑僧乃升壇  
執鑪對衆說法抱貞率監軍僚屬及將吏俱拜其下以  
俸入檀施堆於其傍由是士女駢填捨財億計滿七日  
遂送柴積灌油發焰擊鐘念佛抱貞密已遣人填塞地  
道俄傾之際僧薪並灰數日籍所得貨財輦入軍資庫  
別求所謂舍利者數十粒造塔貯焉

尚書故實  
王象子

國君黃雲趙王李德誠鎮江西有日者自稱世人貴賤

一見輒分王使女伎數人與其妻滕國君同妝梳服飾  
偕立庭中請辨良賤客俯躬而進曰國君頭上有黃雲  
羣伎不覺皆仰首曰者曰此是國君也王悅而遣之

南唐

近事

兩面錢南俗尚鬼狄武襄青征儂智高時大兵始出桂  
之因祝曰勝負無以為據乃取百錢自持之且與神約  
果大捷則投此期盡錢面左右諫止儂不如意恐沮師  
武襄不聽萬衆方聳視已而揮手倏一擲則百錢盡紅

矣於是舉軍歡呼聲震林野武裏亦大喜顧左右取百釘來即隨錢疎密布地而釘帖之加諸青紗籠覆手自封焉曰伺凱旋當謝神取錢其後砍崑崙關取智高平邕管及師還如言取錢與幕府士大夫共視之乃兩面錢也傳

叛亡曹瑋知渭州有告戍卒叛入夏國者瑋方對客奕棋遽曰吾使之行也夏人聞之即斬叛者投其境境上

宋史

塞堤天雄軍豪家芻芟旦野時訪姦人穴官坻為樊咸  
平中趙昌言為守廉知其事未問一日堤潰吏告急昌  
言命亟取豪家所積給用塞堤自是不敢盜穴官堤為  
姦

寓簡

築陂安豐苟陂孫叔敖所創為南北渠溉田萬頃民因  
旱多侵耕其間雨水溢則盜決之遂失灌溉之利李若  
谷知壽春下令陂決不得起兵夫獨調瀕陂之民使之  
完築自是無盜決者

上

致梁种世衡知澠池縣旁山有廟世衡葺之其梁重大  
衆不能舉世衡乃令縣幹翦髮如手搏者驅數對於馬  
前云欲詣廟中教手搏傾城人隨往觀既至謂觀者曰  
汝曹先為我致廟梁然後觀手搏衆欣然移下山共舉  
之頃臾而上其權數皆此類

澠水  
紀聞

禁中賜酒秦檜一日見高宗不懌奏云何事上勞聖慮  
上云郊祀匹帛闕五萬丈檜云臣為陛下任此事忽一  
日奏云乞禁中賜臣酒四金壺將某日宣賜秦約張韓



二將來議事自早至午未得入謁但見中使宣賜御酒  
來心愈惑且驚移時秦與張韓進並不發一語忽云御  
前賜酒同飲一杯張韓捧卮戰慄不敢飲秦先取酒飲  
一勺少定緩云主人要與二將各假一千萬緡以奉郊  
祀祭畢後撥賜張韓謹奉令奏知高廟得旨正五百萬

緡

青耳  
集

殿內紫幕建炎之初虜使講和云使來必須百官郊迎  
其書在廷失色秦檜恬不為意盡遣部省吏人迎之朝

見使人必要褥位此非臣子之禮是日檜令朝見殿廷之內皆以紫幕銷滿北人無辭而退

上

鑄錢京下忽闕見錢市間頗皇皇忽一日秦檜呼一鑄工櫛髮以五千當二錢犒之諭云此錢數日間有旨不使早用了鑄工親得鈞旨遂與外人言之不三日間京

下見錢傾出此宰制天下之小術

貴耳集

檜在相位願指

上下無敢弗從時都下貨壅之見鋸市屢大開府尹以聞檜笑曰易耳即召文思院官未至促者絡繹奔而來

諭之曰達得旨欲變錢法可鑄樣錢一緡進呈廢見鋸不用約翌午畢事院官唯唯而出召工為之富家聞者盡出宿鋸市金粟物價太昂泉溢于市既而樣錢上省寂無聞矣

進青魚秦檜夫人常入禁中顯仁太后言近日子魚大者絕少夫人對曰妾家有之當以百尾進歸告檜檜咎其失言與其館客謀進青魚百尾顯仁拊掌笑曰我道

這婆子村果然

鶴林  
王露

奢

反儉奢張也反儉曰奢從大者言誇大於人也

說文

女樂三萬昔者桀之時女樂三萬人晨譟於端門樂聞

於三衢無不服文綉衣裳者

管子

丹楹丹桓公之楹刻其楠皆非禮也御孫諫曰臣聞之儉德之共也侈惡之大也先君有共德而君納諸大惡

無乃不可乎

莊二十

車美人齊慶封來聘其車美孟孫謂叔孫曰慶季之

車不亦美乎叔孫曰豹聞之服美不稱必以惡終美車

何為

襄十年

慶封來奔獻車於季武子美澤可以鑑展莊

叔見之曰車甚澤人必瘁宜其亡也

二十八年

亡家之主齊高子容與宋司徒見知伯女齊相禮賓出  
司馬侯言於知伯曰二子皆將不免子容專司徒侈皆  
亡家之主也知伯曰何如對曰專則速及侈將以其力  
斃專則人實斃之將及矣

二十

自敗吳師在陳楚大夫皆懼子西施今聞夫差次有臺

榭陂焉宿有妃嬪御馬一日之樂所欲必成玩好必  
從珍異是聚觀樂是務視民如仇而用之日新夫差先  
自敗也已安能敗我

五

崇飾土木吳王夫差築姑蘇臺三年乃成周環詰屈橫  
互五里崇飾土木殫耗人力宮妓數千人又別立春宵  
宮為長夜之飲造千石酒鍾又掘大池池中造青龍舟  
舟中陳妓樂日與西施為水戲又於宮中作海靈館館  
娃閣銅鋪玉檻宮之檻檻皆珠玉飾之

述異記

擬齊楚衛端木叔者子貢之世也藉其先貲家累萬金  
不治世故放意所好其生民之所欲為人意之所欲玩  
者無不為也無不玩也墻屋臺榭園囿池沼飲食車服  
聲樂嬪御擬齊楚之君焉至其情所欲好耳所欲聽目  
所欲視口所欲嘗雖殊方偏國非齊土之所產育者無  
不必致之猶藩牆之物也賓客在庭者日百住庖厨之  
下不絕烟火堂廡之上不絕聲樂奉養之餘先散之宗  
族宗族之餘次散之邑里邑之餘餘乃散之一國行年

六十氣幹將衰棄其家事都散其庫藏珍寶車服妾媵  
一年之中盡焉不為子孫留財及其病也無藥石之儲  
及其死也無瘞埋之資一國之人受其施者相與賦而  
藏之反其子孫之財焉禽骨釐聞之曰端木叔狂人也  
辱其祖矣段干生聞之曰端木叔達人也德過其祖矣

列揚  
朱

金彈韓媽好彈常以金為丸一日所失者十餘長安為  
之語曰苦饑寒逐金丸京師兒童每聞媽出彈輒隨逐



之望丸之所落而競拾取焉

西京雜記

夫妻誇競梁冀為大將軍權震中外其四方調發歲時  
貢獻皆先輸上第於冀乃大起第舍而妻孫壽亦對街  
為宅殫極土木互相誇競堂寢皆有陰陽與室連房洞  
戶柱壁雕鏤加以銅漆牕牖加有綺疏青瑣圖以雲氣  
仙靈臺閣周通更相臨望飛梁石蹬陵跨水道駭鷄犀  
夜光壁充實帑藏名駒龍馬株於內廡與妻乘輦青蓋  
車張羽葆飾以金玉琥珀每遊觀池亭及第內多從倡

優鳴鐘鼓吹竽酣謳竟路日夜相繼及桓帝誅冀收其

資產以實國庫詔減天下一歲租稅之半

後漢

侈靡劉琰字威碩為車騎將軍車服飲食號為侈靡侍

婢數十皆能為聲樂又悉教誦讀魯靈光殿賦

蜀志

示奢甘寧好游俠其出入步則陳車騎水則連輕舟侍  
從被文繡所如光道路住止常以贈錦維舟去或割去

以示奢也

吳書

侈靡居最石崇資產累巨萬金宅室與馬僭擬王者庖

膳必窮水陸之珍後房百數皆曳紈繡珥金翠而絲竹之藝盡一世之選築榭閣沼殫極人巧與貴戚羊琇王愷之徒競相高以侈靡而崇為居最之首琇等每愧羨以為不及也

續文  
章志

僕衣火浣石崇為荊州刺史好俠無賴遣使劫遠使商客致家大富有別館在河陽之金谷財產盈積室宇宏麗與貴戚武帝舅王愷奢靡相尚愷以粘燠釜崇以蠟代薪愷作紫紗步障四十里崇作錦步障五十里愷以

赤石脂塗屋崇以椒塗之武帝助愷珊瑚樹一株高二尺愷以示石崇崇以鐵如意擊破愷不悅崇曰無恨令取六七株還之惠帝知富無以誇之時外國進火浣布天下更無帝為衫來幸崇家崇奴僕五十人皆衣火浣布衫抵承帝大慙

御覽  
晉書

金埒王濟字武子被責移第比邨下于時人多地貴濟好馬射買地作埒編錢西地竟埒時人號曰金溝

世說

日食萬錢何曾字穎考性奢豪務在華侈帷帳車服窮

極綺麗厨膳滋味過於王者每燕見不食太官所設帝  
輒命恥其食蒸餅上不坼作十字不食食日萬錢猶曰  
無下箸處人以小紙為書者勅記室勿報劉毅等數勅  
奏曾侈奢無度帝以其重臣一無所問子劭字敬祖驕  
奢簡貴亦有父風衣裘服玩新故巨積食必盡四方珍  
異一日之供以錢二萬為限時論以為太官御膳無以  
加之

晉書

一食萬錢任愷字元褒既失職乃縱酒耽樂極滋味以

自奉養初何劭以公子奢侈每食必盡四方珍饌愷乃  
踰之一食萬錢猶云無可下筯處 上

獸炭洛下少林木炭正如栗狀羊琇驕奢乃擣小炭為  
屑以物和之作獸形後何劭之徒共集乃以溫酒炙勢  
既猛獸皆張口向人赫赫然諸豪相矜皆服而效之 晉朝

雜記

美兼何孟徐湛之字孝源貴戚豪強產業甚厚室宇園  
池貴游莫及伎樂之妙冠絕一時門生千餘皆三吳富

貴子資質端美衣服鮮麗每出入行游塗巷盈滿泥雨  
日悉以後車載之文帝每嫌其侈縱時安成公何勗無  
忌之子臨汝公孟靈休昶之子也並時奢豪與湛之以  
肴膳器服車馬相尚都下為之語曰安成食臨汝飾湛

之美兼何孟

南史

王石不過宋阮佃夫宅舍園池諸王邸第莫及女妓數  
十藝貌冠絕當時金玉錦繡之飾宮掖不逮也每製一  
衣造一物都下莫不法效焉於宅內開漬東出十許里

塘岸整潔汎輕舟奏女樂中書舍人劉休嘗詣之遇佃夫出行中路相逢要休同反就席便命施設一時珍羞莫不畢備凡諸大劑並皆始熟如此者數十種佃夫常作數十人饌以待賓客故造次便辦類皆如此雖晉世王石不能過也

上

床脚福壽魚弘有眠牀一張皆威柏四面周匝無一有異通用銀鏤金花福壽兩重為脚

南史

為湘東王鎮西司

馬述職西止逢勅迎瑞像王令送像下都弘率部曲數



百悉衣錦袍赫奕滿道頗為人所慕塗經夏首李抗學  
其為人抗舅元法僧聞之杖抗三百

上

南路徐徐君倩字懷簡孝嗣孫琨子也幼聰明好學尤  
長于部書問無不對善絃歌為湘東王鎮西諮議參軍  
頗好聲色侍妾數十皆佩金翠曳羅綺服玩悉以金銀  
飲酒數升便醉而閉門盡日酣歌每遇歡謔則飲至斗  
有時載伎肆意游行荆楚山川靡不畢踐朋從游好莫  
得見之時襄陽魚弘亦以豪侈稱於是府中謠曰北路

魚南路徐然其服玩次于弘也

上

織成戰襖梁時勲豪子弟多縱恣以淫盜屠殺為業父  
祖不能制尉羅不能禁車服牛馬號西豐駱馬樂山烏  
牛董暹金帖織成戰襖直七百萬西豐侯正德樂山侯  
正則暹潮溝董當門子世謂之薰世子者也後皆不得  
其死

上

歲入供饌夏侯道遠好言宴務口實京師珍羞罔不畢  
有於京城之西水次市地大起園池植列蔬果延致秀

彥時往遊適妓女十餘常自娛樂國秩歲入三千餘匹  
專供酒饌不營家產每誦孔融詩曰坐上客恒滿樽中  
酒不空餘非吾事也識者多之

魏書

豪侈未有高陽王雍貴極人臣之兼山海居止第宅匹  
於帝宮白殿丹檻窈窕連亘飛簷反宇轆轤週通僮僕  
六千妓女五百隋珠照日羅衣從風自漢晉以來諸王  
豪侈未之有也出則鳴騶御道文物成行鏡吹響發笳  
聲哀轉入則歌姬舞女擊筑吹笙絲管迭奏連宵盡日

其竹林魚池倖於禁苑芳草如積珍木連陰雍嗜口味  
厚自奉養一日必以數萬錢為限海陸珍羞方丈於前

陳留侯李崇謂人曰高陽一日敵我千日

洛陽伽藍記

豪首魏時帝族王侯外戚公主擅山海之富居川林之  
饒爭修園宅互相誇競崇門豐室洞戶連房飛館生風  
重樓起霧高臺芳樹家家而築花林曲池園囿而有莫  
不桃李夏綠竹柏冬青而河間王琛最為豪首常與高  
陽爭衡造文柏堂形如徽音殿置玉井金鑪以金五色

績為繩諸王服其豪富琛語人云晉室石崇乃是庶姓  
猶能雉頭狐腋畫卯雕薪況我大魏天潢不為華侈造  
迎風館於後園牕戶之上列錢青瑣玉鳳銜鈴金龍吐  
佩素柰朱李枝條入簷伎女樓上坐而摘食琛常會宗  
室陳諸寶器金瓶銀甕百餘口甌擎盤盒稱是自餘酒  
器有水晶鉢瑪瑙琉璃碗赤玉卮數十枚作工奇妙中  
土所無皆從西域而來又陳女樂及諸名馬後引諸王  
按行府庫錦罽珠璣冰羅霧縠充積其內繡纈油綾絲

絲越葛錢絹等不可數計琛忽謂章武王融曰不恨我  
不見石崇恨石崇不見我經河陰之役諸元殲盡王侯  
第宅多題為寺壽丘里閭列剎相望祇洹鬱起寶塔高  
凌四月初八日京師士女多至河間寺觀其廊廡綺麗  
無不歎息以為蓬萊僊室亦不是過入其後園見溝瀆  
蹇產石磴礁礫朱荷出池綠萍浮水飛梁跨閣高桶出  
雲咸皆唧唧雖梁王瓦苑想之不如也

上

禍機崔罔臨終戒其二子曰夫恭儉福之與傲侈禍之

機乘福興者侵以康休蹈禍機者忽而傾覆可不誠歟

北史

十二

萬錢恨儉韓晉明好酒誕縱招引賓客一席之費動以

萬錢猶恨儉率

北齊

一時盛賞孫瑒字德璉性通泰有財散之親友居家頗  
失於侈家庭穿築極林泉之致歌童舞女當世罕儔賓  
客填門軒蓋不絕及出鎮郢州乃合一餘船為大舫於  
中立亭池植荷芰每良辰美景賓僚並集泛長江而置

酒亦一時之勝賞焉

南史

極榮飾秦王俊盛治宮室窮極侈麗後有巧思每親運斤斧工巧之器飾以珠玉為妃作七寶羅籬又為水殿香塗粉壁玉砌金階梁柱楣棟之間周以明鏡間以寶珠極榮飾之美每與賓客妓女弦歌於其上

隋書

龍舟隋煬帝幸廣陵至汴帝御龍舟蕭妃乘鳳舸錦帆綵纜窮極侈靡舟前為舞臺臺上垂蔽日簾簾即蒲澤國所進以負山蛟睫紉蓮根絲貫小珠間睫編成雖曉



日激射而光不能透每舟擇妙麗長白女子千人執雕

版鏤金檝號為殿脚女

隋遺錄

大行殿煬帝巡狩北邊作大行殿七寶帳容數百人飾以珍寶光輝洞徹引匈奴啓民可汗宴會其中可汗恍然疑非人世之有識者云大行殿者不祥之兆也是非王莽輕車之比此寔天心非關人事也

食載

中國神仙裴矩字弘大帝至東都矩以蠻夷朝貢者多諷帝令都下大戲徵四方奇技異藝陳於端門街衣錦

綺珥金翠者以十數萬又勅百官及民士女列坐柵闌而縱觀焉皆被服鮮麗終月乃罷又令三市店肆皆設帷帳盛列酒食遣掌蕃率蠻夷與民貿易所至之處悉令邀延就坐醉飽而散蠻夷嗟歎謂中國為神仙

隋書

飛樓許敬宗奢豪嘗造飛樓七十間令妓女走馬于其

上以為戲樂

獨異記

七寶帳張易之為母阿臧七寶帳金銀珠玉寶貝之類罔不畢萃曠古以來未曾聞見鋪象牙床織犀角簾

鮮貂之褥蛩蟲之氈汾晉之龍鬚臨河之鳳翮以為席  
阿臧與鳳閣侍郎李迥秀畏其盛嫌其老乃荒飲無度  
昏醉是務常頻喚不覺出為恒州刺史易之敗阿臧入  
官迥秀被坐降為衡州長史

食載

流杯池安樂公主改為悖逆庶人奪百姓莊田造定昆  
地四十九里直抵南山擬昆明池累石為山以象華岳  
引水為澗以象天津飛閣步簷斜牆磴道被以錦繡畫  
以丹青飾以金銀瑩以珠玉又為九曲流杯池作石蓮

花臺泉于臺中流出窮天下之壯麗言之難盡悖逆之  
敗配入司農每日士女游觀車馬嗔咽奉敕輒到者官  
人解見任凡人決一頓乃止

上

油灑毬場景龍中妃主家競為奢侈駙馬楊慎交武崇  
訓至以油灑地築毬場

國史  
纂異

競飾車服玄宗將幸華清宮貴妃姊妹競飾車服為一  
處車飾以金翠間以珠玉一車之費不啻數十萬貫既  
而重甚牛不能引因復上聞請各乘馬於是競購名馬

以黃金為銜勒組繡為障泥共會于國忠宅將同入禁  
中炳煥照燭觀者如堵自國忠宅至于城東南隅僕御  
車馬填委其間號國每入禁中常乘驄馬使小黃門御  
紫驄之俊健黃門之端秀皆冠絕一時

明皇  
雜錄

萬花谷楊貴妃得寵兄銛錡國忠諸姨五家第舍聯亘  
治錦繡琢金王者大抵千人變化若神仙每帝幸華清  
宮五家扈從每家為一隊著一色衣五家隊合照映如  
萬花煥發川谷成錦繡遺鈿墮烏瑟瑟珠翠狼藉於道

香聞數十里

上舊唐

鳥羽擇米韋陟逍遙公性奢縱喜飾服馬侍兒閹童列左右常數十侔於王宮主第窮治饌羞擇膏腴地藝穀麥以鳥羽擇米每食視厨中所棄其直猶不減萬錢宴公侯家雖水陸具陳曾不下筯常以五采牋為書記使侍婢主之其裁答授意而已

本傳

進食天寶九年諸貴戚競以進食相尚玄宗命官姚思藝為司校進食使水陸珍羞數千盤一盤費中人十家

之產

續世說

富窳王元寶都中巨豪也常以金銀疊為屋壁上以紅泥泥之於宅中置一禮賢堂以沉檀為軒檻以砮砮斲地面以錦文石為柱礎又以銅線穿錢斲於後園花徑中費其泥不滑也四方賓客所至婦歸故時人呼為

王家富窳

天寶遺事

林畔香童元寶好賓客務於華侈器玩服用僭於王公而四方之士盡歸而仰焉常於寢帳床前雕矮童二人

捧七寶博山鑪自暝焚香徹曉其驕貴如此上

冠絕元載於城中開南北二甲第室宇宏麗冠絕當時  
又於近郊起亭榭所至之處帳帷什器皆如宿設儲不  
改供城南膏腴別墅連疆接畛凡數十所婢僕曳羅綺  
亦百餘人恣為不法侈僭無度

舊唐

曝衣元載妻字韞秀王縉女也初縉鎮北京以女嫁載  
歲久而見輕怠親戚以為乞兒皆厭薄之載遂游秦既  
到京屢陳時務肅宗擢拜中書及代宗兩朝宰相貴盛



無比太原內外親屬悉來謁賀韞秀安置于閒院忽因  
天晴之景以青紫絲條四十條各長三十丈皆施羅紈  
綺繡之飾每條條下排金銀鑪二十枚皆焚異香香至  
其服乃命諸親戚西院閒步韞秀問是何物侍婢對曰  
今日相公與夫人曬曝夜服王氏謂諸親曰豈料乞索  
兒婦還有兩事蓋形羸衣也於是諸親羞赧稍稍辭去

杜陽  
編

三府空耗杜亞為淮南競渡採蓮龍舟錦纜繡帆之戲

費金數十萬于頓為襄州日點山燈一上油二千石李  
昌夔在荊州打獵大修裝飾其妻獨孤氏亦出女隊二  
千人皆著紅紫繡襖子及錦鞍韉此三府亦因而空耗

戴傳

煉炭乾符中東洛有貴家子弟承籍勲蔭錦衣玉食常  
饌必以炭炊往往不愜其意有李使君出牧罷歸感其  
恩舊託門於聖剛者選日廣求珍異邀之至日兄弟列  
坐餽羞每至曾不入口主人揖之再三唯沾果食而已

李莫究其由明日使聖剛往問之曰凡以炭炊饌先燒  
令熟謂之煉炭不然猶有烟氣李宅炭不經煉是以難  
食僧曰非所知及巢寇陷洛昆仲與聖剛同竄不食者  
三日步至河橋僧以囊中數錢買脫粟餐於土杯中同  
食僧笑而謂之曰此非煉炭所炊不知堪與郎君吃否

皆低頭無詞

劇談錄

一燭數萬淮南楊渥居喪晝夜酣飲作樂十圍之燭以  
擊毬一燭費錢數萬

史

錦帳貯馬朱梁朱瑾有所乘名馬冬以錦貯之之夏以

羅幃護之

續世說

飼馬銀槽石晉吐谷渾酋長白承福家甚富飼馬用銀

槽

上

九龍殿馬希範性剛愎好以誇大為事雖去半伏而軍國制度皆擬乘輿乃大興土功建天策府中構九龍殿以沉香為八龍各長百尺抱柱相向作趺捧勢而已坐其間自謂一龍也幞頭腳長犬餘以象龍角凌晨將坐

先使人焚香於龍腹中煙氣鬱然而出若口吐焉近古  
以來諸侯王奢僭未有如此之盛也

上

繒山蜀主王衍奢縱無度常例錦步障毬其中往往遠  
適而外人不知燕諸香晝夜不絕久而厭之更蒸皂莢  
以亂其氣結繒為山及宮殿樓觀於其上或為風雨所  
敗則更以新者易之或樂飲繒山經旬不下山前穿渠  
通禁中或乘船夜歸令宮女秉燭炬千餘居前船却立  
照之水面如晝或酣飲禁中鼓吹沸騰以至達旦以是

為常

上

造大第郭從義鎮河朔於洛中造大第以香柏為棟文梓為梁花石甃池無不備具第成約費白金五千錠初或勸阻不必大奢多費不聽後被召適家秉燭周覽至東郡而卒家人不能居為世所譏

上

地仙張筠初代康懷英為永平節度使掠其家資又於唐故宮掘地得金玉皆巨萬出帝時居洛陽以酒色聲妓自娛者十餘年人謂之地仙

五代史

肉盤南唐孫晟為右僕射家富恣豪侈凡飲宴不用几

案令女伎各執一器環侍其側號肉臺盤

遺事

楊國忠事

同又冬月令妓女圍之曰肉屏風

南唐遺事

寶裝溺器宋太祖伐蜀蜀主昶降舉族至汴帝見昶溺

器以七寶裝飾即命撞破之曰溺器以此飾之當以何

器貯食耶所為如是不亡何待

續記

### 吝嗇

魯俗魯人俗儉嗇而曹邴氏尤甚以鐵冶起富至巨萬

然自父兄子孫約俛有拾仰有取

史記

借錢平陵士孫奮貲至一億七十萬富聞京師而性儉  
吝从子端辟梁冀掾奮送絹五疋食以乾魚嘗宿客舍  
顧錢直甚少主曰君惜錢如此欲作士孫景卿耶

三輔黃圖

不敢自用漢世有人年老無子家富性儉嗇侵晨而起  
侵夜而息營理產業聚斂無厭而不敢自用或從之求  
濟者不得已入內取錢十自堂而出隨步輒減比至於  
外才餘半在閉目以授乞者尋復囑云我傾家贍君慎



勿他說復相效而求老人俄死田資沒入內帑

笑林

天性吳沈峻字叔山性儉宏張溫使蜀時詣沈別沈入內良久出語溫曰向擇一端布欲以送卿而絕無麤者溫佳其無隱又嘗經太湖岸上使從者取鹽水已而恨多敕令還減之尋亦自愧曰此吾天性也

笑林

牙籌司徒王戎既貴且富區宅僮牧膏田水碓之屬洛下無比契疏鞅掌每與夫人以象牙籌晝夜算計家資說世戎性至儉不能自奉養財不出外戶下人謂為膏盲

之疾

王隱  
晉書

女適裴顧貸錢數萬久而未還女後歸寧戎

即不悅女遽還直然後乃惟從子將婚戎遺其一單衣

訖而更責取

世說  
晉書

錢癖和嶠字長與家產豐富擬於王者然性至吝以是

獲譏於世杜預以為嶠有錢癖

晉書

甘果不散王導儉節帳下甘果盈溢不散涉春爛敗都

督白之公令舍去曰慎不可令太郎悅知

世說

被慳太元十二年外國道人有幻術既至國中有一家

巨富而性慳嗔語擔人曰吾試為君破奴慳即至其家  
有好馬甚珍之繫在柱下忽失去尋索不知處明日見  
馬在五升甕中終不可破便語言君作百人厨以周窮  
乏馬得出耳主人即狼狽作之畢馬還在柱下明日其  
公母老在堂上忽復不見舉家惶怖不知所在開妝器  
忽見父母澤壺中不知何由得出復往守請之其人云  
當更作千餘人食飴百窮者乃當得出既作其父母自

在牀上

蜜鬼志

權興富尚書令符推為人樂施乞人填門常曰天下物何常吾今日富后日貧耳忽一日不施則意不太時人為之語曰不為權興富寧作推貧

南史

此酒難遇王琨儉于財用設酒不過兩盃輒云此酒難遇鹽豉薑蒜之屬並掛屏風酒漿悉置床下内外有求

琨手自賦之

南史  
十三

食無重肴曹虎為右衛將軍晚節好貨賄客畜在雍州得見錢五十萬伎女食醬菜無重肴每好風景輒開戶

拍張向之東昏凝虎舊將搶奪其財殺之

南齊書

守錢奴鄧差南郡臨沮人臨江道逢估人先不相識道邊相對共食羅布殊品比差與焉差曰君遠行商估勢不在豐何為頓爾珍羞美食估人曰人生在世終止為身口耳一朝死病安能得進甘味乎終不如臨沮鄧生平生不用為守錢奴耳差不告姓名歸至家宰鷄食動筋骸骨哽其喉而死

廣五行記

厨珍腐棄梁朱异及諸子自潮溝列宅至青溪其中有

臺池玩好每暇日與賓客遊焉四方饋遺財貨充積性  
吝嗇未嘗有散施厨下珍羞恒腐爛每月常棄十數車

雖諸子別房亦不分贍

南史

簾為妓衣夏侯亶性儉率不事華侈晚年頗好音樂有  
妓妾十數人並無被服姿容每有客常隔簾奏之時謂

簾為夏侯妓衣

梁書二十

服纈弊王筠為臨海太守在郡侵刻還資有芒屨兩舫  
家累千金性儉嗇外服纈弊所乘牛常飼以青草及遇

亂為盜所攻墜井卒家人十三口同遇害棄尸空井中

南史

草率南陽有人為生與博性殊儉吞冬至日女壻謁之  
乃設一銅甌酒數臠麋肉壻恨其草率一舉盡之主人  
愕然俛仰命益如此者再退而責其女曰某郎好酒故

汝常貧及其死後諸子爭財遂兄殺弟

顏氏家訓

中減元徽性多嫉妒又恠惜財用自家及國於是有所  
賞錫咸出薄少或多而中減與而復追徒有糜費恩不

金瓶梅  
卷二十八  
感物

魏書

打像為誓封述字君義厚積財產一無分饋雖至親密友貧病困篤亦絕於拯濟物論甚鄙之前妻河內司馬氏一息為娶隴西李士元女大輸財聘及將成禮猶競懸違述忽取所供養像對士元打像為誓士元笑曰封公何處常得應急像須誓便用一息娶范陽盧莊之女述又經府訴云送驪乃嫌腳跛評田則云鹹薄銅器又嫌古廢皆為恠畱所及每致紛紜

北史



做禪北齊庫狄伏連性鄙怯其妻病以百錢買藥每自恨之家口百餘盛夏人料倉米二升不給鹽菜常有饑色積年賜物藏在別庫一婢專掌管籥每入庫檢閱必語妻子此官物不可輒用至死時惟著做禪而積絹至

二萬疋簿錄並歸天府

北史

躬提冠履沈衆約孫也性怯畚內治產業財帛以億計無所分遺其自奉養其薄每於朝會之中衣裳破裂或躬提冠履永定二年兼起部尚書監起太極殿恒服布

袍芒屨以麻繩為帶又攜乾蔬菜囊麥飯餅入獨噉之

朝士共謂其所為

陳書

數米秤薪韋莊頗讀書數米而炊秤薪而爨炙少一爨而覺之一子八歲而卒妻斂以時服莊剥取以故席裊屍殯訖擎其席而歸其憶念也嗚咽不自勝惟慳吝爾

朝野  
僉載

月下食奴夏侯彪夏月食飲生蟲在下未曾漚口嘗送客出門奴盜食醬肉彪還覺之大怒乃捉蠅與令令嘔

之朝野  
食載

陳物充腸天寶中相州王叟者家鄴城富有財物唯夫  
與妻更無兒女積粟近至萬斛而夫妻儉嗇頗甚常食  
陳物纔以充腸不求豐厚莊宅尤廣客二百餘戶叟常  
巡行客坊忽見一客方食盤餐豐腴叟問其業客云唯  
賣雜粉香藥而已叟疑其作盜問汝有幾而衣食過豐  
也此人云唯有五千之本逐日食利但存其本不望其  
餘故衣食常得足耳叟遂大悟歸謂妻曰彼人小得其

利便以充身可謂達理吾今積財巨萬而衣食陳敗又無子息將以遺誰遂發倉庫廣市珍好恣其食味不數日夫妻俱夢為人所錄枷鎖禁繫鞭撻俱至云此人妄破軍糧夫妻並卒官軍圍安慶緒于相州盡出其廩以供軍馬

原化記

胡訥聞見錄梓州民陳氏事同

噉肉封殘歸登尚書性甚吝嗇常爛一羊脾旋割旋噉封其殘者一日登妻誤於封處割食登不見元封大怒其內由是沒身不食肉登每浴必屏左右或有自外窺

之乃巨龜也

北夢瑣言

什器屋貯裴司徒璩姓靳畚廉問江西日凡什器圖障皆新其制間屋貯之未嘗施用每有宴會即於朝士家借之

上

係鑰衣下漢吏部侍郎張允家資萬計而性吝不委妻子自係鑰匙于衣下如環佩吉郭威入京師允匿佛殿藻井之上板壞而墜凍餓而死

續世說

獵酒漢韋思在上黨五年無令譽可稱唯以聚斂為事

性又鄙吝未嘗與賓佐有酒食之會有從事欲求謁見者思覽刺而怒曰必是來獵酒也命典客者飲而遣之其鄙吝如此

上

種珠記顓陳繼善自江寧尹拜少傅致仕富於資產性鄙屑別墅林池未嘗暫適既不嗜學又杜絕賓客惟自荷以鋤理小圃成畦以真珠之餘顓若種蔬狀布土壤之間既顓俯拾周而復始以此為樂焉

南唐近事

出鉅南漢鍾元章劉晟時為中書舍人性吝嗇歲獲賜

資甚厚然未嘗分遺故人其妻牢氏有賢行常語允章曰妾昔聞君子家無釜鬻烹茶作糜止用一鉞尚且接待朋友今寶貨盈室而又路榛蹇雖富且貴何鄙尚也乃出鉞以示允章允章大慙自是稍揮散矣

九國志

杯水飲客孟蜀范禹中為翰林學士性吝嗇好聚財令輸錢數千緡三掌貢舉賄厚者登高科面評其置無有愧色與馮贇堯為布衣交家貧無貲終不放登第後從昶歸宋為鴻臚卿有門生自陽城至相見甚歡延話終

日乃曰吾近鑿一井水甚甘乃各飲一杯竟不設席其  
人鄙吝如此

蜀志

貪

張眼視錢馬援平交趾上言太守蘇定張眼視錢無心  
目討賊怯於戰功宜加切勅後定果下獄

東觀漢記

涸軒載歸羊元羣宛陵人漢桓帝時罷北海郡脏汚狼  
藉郡舍有涸軒制作奇巧亦載以歸河南尹李膺表按  
其罪元羣厚賂宦官膺竟反坐輸作左校

通鑑



府記欲錢李盛為蜀郡守貪財重賦國人刺之曰盧鵲

何諠諠有吏來在門披衣出門應府記欲得錢

華陽國志

黃魚收稻交州刺史朱符多以鄉人虞褒劉彥之徒分

作長吏侵虐百姓彊賦於民黃魚一枚收稻一斛百姓

怨叛山賊並出攻州突縣

吳志薛鯨傳

取吳半東門吳歷吳郡濟陰太守所在貪濁謠曰東門

吳取吳半吳不足濟陰續

魯國先賢傳

動手商則仕廉丘尉性廉縣令丞多貪因宴會舞令丞

舞皆動手尉則回身而已令問其故則曰長官動手贊  
府亦動手惟有一箇又動手百姓何容活耶人皆大笑

嘲曰令丞俱動手縣尉止回身

裴啓  
語林

單衣石勒參軍周雅為館陶令盜官絹數百疋下獄後  
每設大會使與俳兒著介幘單衣優問曰汝為何官  
在我俳中曰本館陶令計贓三千數單衣曰致坐是耳  
故入輩中以為大笑

趙書

賜布令負宋該字宣弘為右長史太祖會羣僚以該性

貪故賜布百餘疋令負而歸重不能勝至僵僵以愧

辱之

燕書

變土殷仲文性貪吝多納貨賄桓玄為劉裕所敗仲文隨玄西走其珍寶玩好悉藏地中皆變為土

晉書

佳驢庾炳之字仲文領選頗通貨賄諸見人有物鮮或不求聞劉遵考有材便乞材見好燭盤便復乞之劉伯龍大慷慨仲文所行有人送張幼緒語人吾雖得一縣負錢三十萬荀萬秋嘗詣仲文逢一客姓夏侯主人問

有好牛不言無問有好馬不又言無政有佳驢耳仲文便答甚是所欲客出門遂相聞索之在尚書令令奴沽

鄴酒利其百十亦是立臺閣所無

宋書

賦鷄卵謝朓孝武初為吳興以鷄卵賦人收鷄數千及遁節不全為清議所少

南史

貪惓齊武帝贖為太子時性貪惓常謂人曰惟王惠景知我貧嘗至其益州刺史劉悛宅晝卧覺悛自捧金澡盤面廣三尺愛姬執金澡罐受四升以充沃盥因以奉

贖納之

魏島  
夷傳

劉峻為益州貪暴刻剥至富浴盆以金為

之餘物稱是事露齊王貴死禁錮終身

鑑

錢愚梁臨川王蕭宏性愛錢百萬為一聚黃榜標之千  
萬為一庫懸一紫標如此三十餘間帝與他卿屈指計  
見錢三億餘萬餘屋貯布絹絲綿漆蜜紵蠟朱沙黃屑  
雜貨但見滿庫不知多少晉財有錢神通豫章王綜以  
宏貪吝遂為錢愚論其文甚切帝知以激宏宣與與綜  
天下文章何限那忽作此雖令急毀而流布已遠宏深

病之聚斂稍改

南史

白刼元修又為齊州刺史在州多受納累遷吏部尚書  
及在銓衡唯事貨賄授官大小皆有定價時中散大夫  
高居者有旨先叙去黨郡缺居遂求之修義私已許人  
抑居不與居大言不遜修義命左右牽曳之居對大衆  
呼天唱賊人問居曰白日公庭安得有賊屈指修義曰  
比坐上者違天子明詔物多者得官京師白刼此非大  
賊乎修義失色居行罵而出

北史

市曹魏右衛將軍元暉與侍中盧昶皆有寵於魏主而貪縱時人謂曰餓虎將軍饑鷹侍中暉尋選吏部尚書用官皆有定價大郡二千足次郡下郡遞減其半餘官皆有等差選者謂之市曹

通鑑

不將宮來魏河間嗣王琛字曇寶世宗時拜定州刺史憑恃內外多所受納貪恠之極及還朝靈太后詔曰琛在定州惟不將中山宮來自餘無所不致何可更復叙用由是遂廢于家後以金寶巨萬計賂劉騰得為秦州

刺史充都督既總軍省求欲無厭百姓患害有甚虎狼

親書

十錢主簿元慶智安州刺史法壽子也性貪鄙為太尉

主簿事無大小得物儀後判或十段誠或二十誠得便

取之府中號為十錢主簿

北史

呼商為兒字文述貪鄙知人有珍異之物必求取之富

商大賈皆恩接之呼之為兒

隋書

賜繩江王元祥高祖子也高宗時歷金部鄭三州刺史



性貪鄙多聚金寶營求無厭為人吏所患時滕元王嬰

將王惲號王鳳亦稱貪暴有授得其府官者以北嶺南

惡處為之語曰寧向儋崖振白不事汪滕蔣號

舊唐

滕王

嬰蔣王惲皆不能廉慎文帝賜諸玉帛各五十惟不及

二王勅曰滕叔蔣兄自解經紀不勞賜物與之繩萬條

以為錢貫二王大慙朝官莫不自勵皆以取受為贓污

有終身為官莫敢犯者

食載

鷄卵益州新昌縣令夏侯彪之初下車問里正曰鷄子

一錢幾顆曰參顆虎之乃遣取十千錢令買三萬顆謂里正曰吾未要且寄鷄母抱之遂成三萬頭鷄經數月長成令便與我賣却一鷄三十錢半年之間成三萬又問竹笋一錢幾莖一錢五莖又取十千錢付之買得五萬莖謂里正曰吾未須笋且林中養之至秋竹成每一莖十錢遂成五十萬其貪猥不道皆此類

貪戴

驪羅汴州刺史王志愔飲食精細對賓下脫粟飯商客有一驪日行三百里曾三十千不賣市人報價云四千

惜曰四千金少更增一千又令買單絲羅疋至三千惜問用幾兩絲對曰五兩惜令豎子取五兩絲來每兩別與十錢手功之直

僉載

非錢不行鄭惜為吏部侍郎掌選賊汙狼籍有選人繫百錢於靴帶上惜問何故荅曰當今之選非錢不行惜

默然不言

僉載

翹關負鼎崔湜為吏部侍郎掌銓有選人引過自訴云某能翹關負鼎湜曰若壯何不兵部選荅曰外人皆云

崔侍郎下有氣力者即得

會載

守鞋人鄭仁凱為密州刺史有少奴告以履穿凱曰阿

公為汝經營耶有頃門夫著新鞋著凱廳前樹上有鴛

啄木也

窠遣門夫上樹取其子門夫脫鞋而緣之凱令奴

著鞋而去門夫徒跣訴之仁凱曰刺史不是守鞋人

會載

沉船江夏李色之為海州也日本國使至海州凡五百

人載國信有十船珍貨數百萬是見之舍於館厚給所

須禁其出入夜中盡取所載而沉其船既明諷所館人

白云昨夜海潮大至日本國船盡漂失不知所在於是  
以其事奏之勅下邕令造船十艘善水者五百人送日  
本使至其國邕既具舟及水工使者未發水工辭邕邕  
曰日本路遙海中風浪安能却返前路任汝便宜從事  
送人喜行數日知其無備夜盡殺之遂歸邕有好客養  
亡命數百人所在攻劫事露則殺之後竟不得死且坐  
其酷濫也

紀聞

宮中所無福建鹽錢院官盧昂坐贓三十萬簡辭按之

於其家得金牀瑟瑟枕大如斗昭愍見之曰此宮中所  
無而盧昂為吏可知也

唐舊

簡辭按鞠累月乃得以進召

市人估之或云寶無價或云美石非真瑟瑟也

國史補

曰塘衛中行自福察有贓流於播州會赦北還死於播  
之館置於白塘中南北送死無棺槨之具稻熟時理米

鑿米若小舟以為白土人呼為白塘

南部新書

鬻官薛逢吉在中書除吏多納貨賄市權鬻官謗者謹  
飭鳳翔李永吉初朝京師逢吉以永吉故秦王從驪子

家世王侯當有奇貨使人告永吉許以一州而求其先  
王玉帶永吉以無為解逢吉乃使人市一玉帶直數千  
緡責永吉償之前客省使王筠自晉末使楚至是還逢  
吉意筠得楚王重賂遣人求之許以一州筠怏怏以其  
橐裝之半獻之而皆不得州

五代史

錢窟孟蜀眉州刺史申貴殘虐聚斂諭獄吏令賊徒引  
富民為黨以納其賂常指獄門曰此吾家錢窟被訴下  
獄責維州司戶至犀浦賜死民家相賀

蜀詩  
杭

打草驚蛇王魯為當塗宰頗以資產為務會部民連狀訴主簿貪賂於縣尹魯乃判曰汝雖打草吾已驚蛇其

為好事者口實焉

南唐近事

拔釘錢趙在禮之在宋州也所為不軌百姓苦之一旦遷制移鎮永興百姓欣然相賀曰此人若去可謂眼中拔釘子何快哉在禮聞之怒欲報拔釘之謗遽上表更求宋州一年時朝廷姑息勲臣詔許之在禮於是命吏籍管內戶口不論主客每歲一千納之於家號曰拔釘



錢莫不公行督責有不如約則加之鞭扑雖租賦之不

若也是歲獲錢百萬

五代史補

掠地皮魏王徐知訓為宣州帥苛政歛下百姓苦之因  
入覲賜宴伶人戲作綠衣大面胡人若神鬼狀突然而  
出傍一人問曰何為者綠衣人對曰吾宣州土地神也  
問汝來何為曰王入覲地皮掠來故某因至於此上

大笑

南唐近事

渠伊拚鬚張崇帥廬州好為不法士庶苦之常入覲江

都廬人幸其改任皆相謂曰渠伊必不復來矣崇復歸  
乃計口索渠伊錢明年又入覲盛有罷府之議人不敢  
指實道路相見皆捋鬚相慶崇歸又徵捋鬚錢嘗因燕  
次一伶人假為死者被譴當作水族陰吏請於主者主  
者判云焦湖百里一任作獺崇因大慙

上

同優為賀客西京留守同平章事王守恩性貪鄙導事  
聚歛喪車非輸錢不得出城下至扞厠行丐之人不免  
課索或縱麾下令盜人財有富室娶婦守恩與俳優數

人往為賀客得銀數鉅而返

通鑑後漢隱帝

示衆生日開寶中神泉縣令張某者新到官外以廉潔自矜內則貪黷自奉其例甚多一日自榜縣云某月某日是知縣生日告示門外與給使諸色人不得輒有獻送有一曹吏與衆議曰宰君明言生辰日意令我輩知也言不獻送謙也衆曰然至日各持鰓獻之命曰續壽衣宰一無所拒感領而已復告之曰後月某日是縣君生日更莫將來無不嗤者得之於神泉進士黃鳳時王

屈以鷺鷥詩諷之云飛來疑似鶴下處欲尋魚取為中

的

該聞錄

敗宮宋禮部員外王子韶修說文畢作進書表以示同舍龐元英云前漢藝文志裨官之說亦自可用有一士人遽云富丞相曾用此故事衆問其故曰貪以敗官舉

坐笑之

文昌雜錄

聚納響薛吉不屬清節守汾州有納聚之響猶言有聚

納聲也

海錄

高遵貪酷之響帝頗聞之

魏書

酷虐

刻深衛鞅內刻刀鋸之刑外深斧鉞之誅步過六尺者  
有罰棄灰於道者被刑一日臨渭水而論囚七百餘人  
渭水盡赤號哭之聲動於天地

新序

倉鷹郅都遷為中尉是時民懼畏罪自重而都獨先嚴  
酷政行法不避貴戚列侯宗室見都側目而視號曰蒼

鷹

本傳

孔虎甯成事景帝好氣為少吏必陵其長為人上操下

急如束濕猾賊任威

本傳

成家居上欲以為郡守公孫宏

曰臣居山東為小吏時成為濟南都尉其治如狼牧羊

成不可令治民上乃拜成為關都尉歲餘關吏稅肆郡

國出入關者號曰寧逢乳虎無直寧成之怒

義縱傳

鷹擊義縱為定襄太守縱至掩定襄獄中重罪二百餘人及賓客昆弟私入相視者亦二百餘人縱一切捕鞠曰為死罪解脫是日皆報殺四百餘人郡中不寒而栗猾民佐吏為治是時趙禹張湯為九卿矣然其治尚寬

輔法而行縱以鷹擊毛鷲為治

上

屠伯嚴延年少學法律為涿郡太守吏皆股弁道不拾遺選河南太守冬月傳屬縣囚會論府上流血數里河內號曰屠伯張敞以書喻之延年報曰莠盛苗穢不可不除延年母從東海來欲從延年臘適見報囚母大驚母畢正臘謂延年天道神明不可獨殺我不意當老見壯子被刑戮也行矣去女東歸除掃墳地耳後歲餘果敗

本傳

荀悌為青州刺史多置參佐轉易守令以嚴刻立

功日加斬戮流血成川人不堪命號曰屠伯及弟純代領青州刑殺更甚於晞百姓號小苟酷於大苟

晉書

虎穴尹賞字子心成帝時選守長安令修治長安獄穿地方深各數丈致令辟為郭以大石覆其口名為虎穴收輕薄少年惡子勅以為通行飲食群盜賞親閱見十置一其餘盡以次內虎穴中百人為輦覆以大石數日

一發視皆相枕藉死

漢書

李麟甲李嚴為都護用法深刻人歌之曰難可狎李麟



甲江表  
傳

古今所無羊聃元帝時遷廬陵太守剛克竊暴恃國恩  
縱恣尤甚睚眦之嫌輒加刑殺疑郡人簡良等為賊盜  
二百餘人誅及嬰孩所斃鑠復百餘庾亮執之歸於京  
都罪當死以羊后是其祖姑應入議成帝詔曰此書古  
今所無何入議之有有賜命獄所羊后入殿叩頭請命  
王導原啟原之除名頃之遇疾恒見簡良等為祟旬日  
而死

晉書

殺具苻捷凶淫暴虐常彎弓露刃以見朝臣鉗錘鋸鑿  
所可為殺人之具備置左右即位未幾自公卿以下至  
於僕隸殺五百餘人

晉中興書

載記苻生事

投刃郭謩畧地之際王孫八人年幼悉隨乳母先在東  
苑謩遂盡投王孫於鋒刃之上或肢分節解飲血盟衆  
覲者無不掩目寒心而謩意氣修然

涼州記

置劍赫連勃勃凶殘好殺常居城上置矛劍於側有所  
嫌忿手自戮之羣臣忤視者殺目笑者決脣諫者截其

舌而斬之

崔鴻  
夏錄

動用軍法宗越御衆嚴酷好行刑誅睚眦之間動用軍  
法時王玄謨御下亦少恩將士為之語曰寧作五年徒  
不逢王玄謨玄謨猶尚可宗越更殺我

宋書

奚度拍大明中奚顯度常使主領人功而苛虐無道動  
加捶撻暑雨寒虐不聽暫休人不堪命或有自經死者  
人役聞配顯度如就刑戮時建康縣考囚或用方材壓  
頰及踝踉民間謠曰寧得建康壓雖不能受奚度拍又

相戲曰勿反顧付夷度其酷暴如此前廢帝嘗戲云顯  
度刻虐為百姓所疾比當除之左右因倡諾即日宣旨  
殺焉時人北之孫皓殺岑昏上

卧虎宋孝武帝時蕭惠開明識過人嘗三千沙門一閱  
其名退無所失拜益州刺史嚴用威刑蜀人號曰卧虎

南董宣為洛陽令京師號為卧虎漢書

拳擊木人汝陽太守王道標下縣作木人二枚高八尺  
豎着郡門有犯事者使拳擊木人令倒倒者免罪力弱

者手拳傷剝

元嘉起  
居注

置劉確汝南王悅好讀佛經覽書史後絕房中而更好  
男色輕忿妃妾至加捶撻同之婢使孝昌中除州司牧  
為大劉確置於州門盜者便欲斬其手姦偷畏之而慙

息

魏書

天狗下羊祉字靈祐魏宣武帝時自當官不憚強禦朝  
廷時有檢覆每令出使然好募刑名頗為深文所經之  
處人號天狗下及出將臨州並無恩潤兵人患其嚴虐

北史  
魏書

非人理段乂雲酷暴殘忍非人理所及為家尤甚子姓  
僕隸恒瘡痕徧體

鞭面李彪為中尉號為嚴酷以姦欺難得乃為木手擊  
其胸腋氣絕而復屬者時有焉又慰喻汾州叛胡得其  
兇渠皆鞭面殺之及彪病體上往往創潰痛毒備極

北史

彌尾青魏宋譏為河陰令縣舊有大枷時人號曰彌尾  
青及譏為縣上吏請焚之譏曰且置於南墻下以待豪

家後內監楊小駒詣縣請事辭色不遜命取彌尾青以

鎮之於是威振京師

本傳

瞎虎谷楷眇一目而性甚嚴忍前後奉使皆以酷暴為

名時人號曰瞎虎

魏書

校事盧裴字子章性殘忍以強斷知名齊天保中京畿

詔獄酷濫非人情所為無問事之大小拷掠過度於大

棒車幅下死者非一或嚴冬至寒置囚於冰雪之上盛

夏酷熱暴之日下枉陷人至死者前後百餘伺察官人

罪失動即奏聞朝士見之莫不重跡屏氣皆目之為校

事裴與李庶俱鞭杖死獄中

北史

刺眼魚贊俱羅弟也性凶暴虐其部下令左右炙肉遇

不中意以籤刺瞎其眼溫酒不適口者立斷其舌

隋書

試杖燕榮隋文帝時除幽州總管嚴酷有威容鞭笞左

右動至千數流血盈前飲噉自若嘗按部道次見叢荆

堪為笞箠命取之輒以試人人或自陳無咎榮曰後有

罪當免及後犯細過將搨之人曰前日被杖許有罪宥



之榮曰無過尚爾況有過邪榜捶如舊

北史

酢灌桷竅元宏嗣文帝時為幽州總管每鞠囚多以酢灌鼻或桷弋其下竅無敢隱情姦偽屏息

上

時謂於菟趙仲卿性麗暴文帝時遷朔州總管時塞北盛興屯田仲卿總統之微有不理者仲卿輒召主掌撻其胷背或解衣倒曳於荊棘中時人謂之於菟

上

生羅刹或和思斷獄囚無問善惡貴賤必被枷鎖桎械困苦備極囚徒見者破膽喪魂號生羅刹其妻前後孕

男女四人臨產即悶絕求死所生男女皆著肉鑱手脚

並有肉紐束縛連絆墮地後為縣令坐法杖死

廣記

大業

中有卒酷暴諸囚後生一子肩上有若肉枷無頸

五行記

飲醋炙艾崔宏度性嚴酷為襄州總管吏人戰栗時有

屈突蓋者亦嚴刻長安為之語曰寧飲三斗醋不見崔

宏度寧炙三斗艾不逢屈突蓋凡通為左衛將軍泣

功勁正時語曰寧食三斗葱不逢屈突通

隋書

湯德幹厯

刺史立威人語曰寧食三斗炭不逢湯德幹

唐書

噉人隋末荒亂狂賊朱粲起於襄鄧間歲飢米斛萬錢  
亦無得處人民相食粲乃取嬰兒蒸而噉之因令軍士  
曰食之美者寧過於人肉乎但令他國有人我何所慮  
即勒所部有畧得婦人小兒皆烹之分給軍士乃稅諸  
城堡取小弱男女以益兵糧後遣使請降高祖令段確  
迎勞之確因醉侮粲曰聞卿噉人作何滋味粲曰若噉  
嗜酒之人正似糟藏猪肉確怒慢罵曰狂賊入朝後一  
頭奴耳更得噉人乎粲懼於坐收確及從者數十人奔

於王世充

唐 僖

鞭撻流血洛州都督竇軌太穆皇后三從兄性剛嚴好  
殺為益州行臺僕射多殺將士其部衆無貴賤少長不  
恭命即立斬之每日吏士多被鞭撻流血滿庭見者莫  
不重足股栗軌初入蜀將其甥以為心腹嘗夜出呼之  
不以時至怒而斬之每誠家僮不得出外嘗遣奴就官  
厨取漿而悔之謂奴曰我誠使汝要當斬汝頭以明法  
耳遣其部將收奴斬之其奴稱冤監刑者猶豫未決軌

怒俱斬之行臺郎中趙宏安知名士也軌動輒榜箠箠至數百上又害行臺尚書韋雲起貞觀二年在洛病甚忽言有人餉我瓜來左右報之冬月無瓜軌曰一盤好瓜何謂無耶既而驚視曰非瓜並是人頭軌曰從我償命又曰扶我起見韋尚書言畢而死

廣記

峻網周唐革命將相陰謀非其父兄即其子弟往往事洩多被論告差使推勘獲實即酬官賞由是告密之輩推覈之徒因相誣構共行深刻新開摠監之內洛州牧

院之中遞成秘獄互為峻網塞窻瑾戶麤杖大枷追攝  
掩捉匪朝伊夕炬火圍宅刀棒闌門苦楚拷掠非承不  
放來俊臣既便決雲弘嗣亦手刃張虔勗郭弘霸傳李  
思微之首王弘義亦梟毛玄素之元朝野屏氣道路以

目通  
典

例竟則天稱制懼天下不服欲制以威漸引酷吏務令  
深文以案刑獄時周興來俊臣等相次受制推究大獄  
乃於都城麗景門內別置推事院俊臣推勘必獲專令

俊臣等按鞠亦號為新開門但入新開門者百不全一  
王弘義戲謂麗景門為例竟門言入此門者例皆竟也

上來俊  
臣傳

十枷來俊臣每鞠囚無問輕重多以醋灌鼻禁地牢中  
或盛之瓮以火圍遶灸之兼絕其糧餉至有抽衣絮以  
嗽之者其所作之大枷凡有十號一曰定百脉二曰喘  
不得三曰突地吼四曰著即承五曰失魂膽六曰實同  
反七曰反是實八曰死猪愁九曰求即死十曰求破家

又令寢處糞穢備諸苦毒每有制書寬宥囚徒俊臣必先遣獄卒盡殺重罪然後宣示

上志

後俊臣將羅告武氏

諸偽王及太平公主張易之等遂忠發之則天屢保持而諸武及公主恐懼共毀之乃棄市國人無少長皆怨恨競剮其肉斯更而盡則天降勅曰來俊臣諸王等磐石宗枝必期毀敗南北衙文武將相咸擬傾危宜加赤族之誅以雪蒼生之憤既族之無問士庶男女相慶於道路咸曰自此後卧乃背得着床不爾朝不謀夕矣

御史



臺人爭抉目撻肝醢其肉湏臾盡以馬踐其骨無子遺

唐酷吏傳

牛頭夜叉周興拷縛罪人有仙鶴曬翅胡孫碾茶鬼曳鑽牛拔楔之名時人呼為牛頭夜叉

按寶錄金藏作牛頭阿婆

索使周推事使元索禮時人號為索使太后得告密者輒令元禮等推之競為訊囚酷法或以椽開手足而轉之謂之鳳凰曬翅或以物絆其腰引枷向前謂之驢駒拔楔或使跪捧枷累甃其上謂之仙人獻果或使立高

木之上引枷尾向後謂之玉女登梯或倒懸石縋其首或以醋灌鼻或以鐵圈轂其首而加楔至有腦裂髓出者每得囚輒先陳其械具以示之皆戰栗流汗望風自

誣

金載  
通鑑

來索索元禮以酷毒轉甚則天收人望而殺之天下之人謂之來索言酷毒之極又首按制獄也載初元年十月周矩上疏諫曰頃者小人告訐習以為常推勅之吏皆以深刻為功鑿空爭能相矜以虐泥耳籠頭枷研揆

總摺脅籤爪懸髮薰耳卧隣穢溺曾不聊生號為獄持  
或累日節食連宵緩問晝夜搖撼使不得眠號曰宿囚  
此等既非木石且救目前苟求賒死

本傳

狼毒野葛王宏義每暑月繫囚必於小房中積蒿而施  
糠穢遺之者斯湏氣絕矣苟自誣引則易於他房與俊  
臣常行移牒州縣惛懼自矜曰我之文牒有如狼毒野

葛也

舊唐書

援刀自剗郭宏霸嘗推芳州刺史李思憊拷捶考禁不

勝而死聖歷中屢見思徵甚惡之嘗因退朝遽歸命家人曰速請僧轉經設齋須臾見思徵從數十騎上其廷曰汝枉陷我我今取汝霸周章惶怖援刀自刎其腹斯須蛆爛矣是日閭里亦見兵馬數十騎駐於門少頃不復見矣上時洛陽橋壞行李弊之至是而成自春大旱至霸死雨足則天嘗問羣臣比在外有所好事舍人張元一素滑稽對曰外有三慶旱降雨一慶中橋新成萬代之利二慶郭霸身死百姓皆歡三慶也天后笑曰霸

見憎如此耶

二唐書俱載稍畧

鬼遮截馬侍御史萬國俊令史出身殘忍為懷楚毒是  
務奏六道使誅斬流人殺憲無數後從臺出至天津橋  
南有鬼滿路遮截馬足不得前進口云叩頭緩我連聲  
忍痛俄而據鞍舌長數尺遍身青腫輿至宅夜半而卒  
三豹監察御史李嵩李全交殿中王旭京師號為三豹  
嵩為赤鰲豹交為白額豹旭為黑豹皆恨虐慘刻每訊  
囚必鋪棘卧削竹籤指方梁壁蹀碎瓦搯膝遺作獼猴

鑽火上麥索下關單人不聊生囚皆乞死京人相要作  
呪曰若違心負教橫遭三豹其毒害也如此

會載

人頭羅剎御史李全交等以羅織為業臺中號為人頭  
羅剎殿中王旭號為鬼面夜叉

上

酷報御史魏靖上言曰臣聞郭宏霸自刺而唱快萬國  
俊被遮而遮亡霍獻可臨終膝拳於項李敬仁將死舌  
至於臍皆衆鬼滿庭羣妖橫道惟徵集應若響隨聲備  
在人謠不為虛說

唐志

枉戮尸起左史江融耿介正直揚州徐敬業反被羅縱  
酷吏周興等枉奏殺之斬於東都都亭驛前融將被誅  
請奏事引見興曰囚何得奏事融怒叱之曰吾無罪枉  
戮死不捨汝遂斬之尸乃激揚而起踳躐十餘步行刑  
者踏倒還起坐如此者三乃絕雖斷其頭似怒不息無

何周興死

會載

人妖楊務廉孝和時奏開陝州三門鑿山燒石巖側施  
棧道牽船河流湍急牽船夫皆令其繫二鉤於胃皆落

棧著石百無一存道路聲號悲動山谷皆稱揚務廉為  
人妖天生此妖以破殘百姓上

杖須腫憤開元九年有王鈞為洛陽尉十八年有嚴挺  
之為河南丞皆性毒虐笞罰人畏其不死皆杖訖不放  
起須其腫憤徐乃重杖之出血流地苦楚欲死鈞與安  
之始眉目喜暢故人吏懾懼舊唐上御五鳳樓酺宴觀音

樂隘不得奏金吾白挺如雨不能遏上患之高力士  
奏河南丞嚴挺之為理嚴為人所畏請使止之上從之



挺之以手板繞場畫地曰犯此者死於是盡三日人指

其畫以相戒無敢犯者

通鑑  
玄宗

羅鉗吉溫性禁害果於推劾李林甫將起刑獄除  
不附已者引之於門與羅希奭同鍛鍊詔獄時稱羅鉗

吉溫惡其深刻也

舊唐

取媚成獄吉溫之按楊慎矜侍御史盧鉉同其事鉉先  
與張瑄同臺情旨素厚貴取媚於權臣誣瑄與楊慎矜  
共解圖讖持之為驢駒拔擢以成其獄及被貶為廬江

長吏在郡忽見瑄為祟乃云端公何得來乞命不自由鉉須臾而卒

上

勛鼈榆敬羽肅宗時為監察御史以苛刻見委任作大

枷有勛鼈

新作尾

榆著即問絕又卧囚於地以門闕輾其

腹號為肉鑄飢掘地為坑實棘刺以敗席覆其上領囚

臨坑訊之必墜其中萬刺攢之及嗣薛王珍潛謀不軌

詔羽鞠之羽召支黨羅於廷索勛鼈榆枷之布拷訊之

具以繞之信宿成獄珍坐死

上

毛敬裴畢敬羽與毛若虛在臺若虛眉毛覆於眼其性殘忍五六年間臺中囚繫不絕又有裴昇畢曜同為御史皆酷毒人之陷刑當時有毛敬裴畢之稱裴畢尋又流黔中羽寶應元年貶為道州刺史尋有詔殺之<sub>上</sub>

深文陷罪肅宗收復兩都崔器為三司使性刻樂禍陰忍寡恩希旨深文奏陷賊官陳希烈達奚珣等數百人皆抵死李峴執奏乃以六等定罪<sub>上</sub>後為御史大夫上元元年病脚腫月餘漸盲目即見達奚珣但口稱叩

頭大尹不自由左右問之良久荅曰達奚尹訴冤我求

之如此經三月不止而死

談賓錄

濕稍建中中李希烈攻汴州城未陷驅百姓婦女及輜

重以實濠塹謂之濕稍

傳載

襄樣節度襄陽人善為漆器天下取法謂之襄樣及于

司空為帥多暴鄭元鎮河中亦暴遠近呼為襄樣節度

國史

補

枷有三脫王悅為盤屋鎮將軍士犯令杖而枷之百日

乃脫未及百日而脫者有三我死則脫爾死則脫天子  
之命則脫由是秋毫無犯<sup>上</sup>王悅為唐昌令殺錄事李  
之而不辜之既死長子作靈語曰王悅不道枉殺子予  
必報其聲甚厲經數日悅盡坐廳事忽拳歐其腰聞者  
殷然驚顧無人既暮擊處微腫焉且痛其日李之男又  
言曰吾已擊王悅正中要害處即當殺之悅疾甚則至  
蜀郡謁醫不愈未死之前日李之命其家造數人饌仍  
言曰吾與三人至蜀郡錄王悅食畢當行明日悅死而

悅腫潰處正當右腎即李之所為也

紀聞

一部鼓吹蜀李匡遠為少府監性嚴刻一日不斷刑則  
慘然不樂常聞捶楚之聲謂人曰此吾一部肉鼓吹臨  
終曰吾平生殺數十僧道以此享壽八十二及葬盜伐  
其墓斷其四肢及殘刑之報也

外史  
梅祝

合歡杖劉銖漢高祖時為永興軍節度使用法亦自為  
刻深民有過者問其年幾何對曰若干即隨其數杖之  
謂之隨年杖一人必兩杖俱下謂之合歡杖又增民租

畝出錢三十以為公用民不堪之

五代史

燒錢灼臂錢惟濟字巖夫仁宗時知定州有婦人待前  
妻子不仁至燒銅鐵灼臂惟濟取婦人所生兒置雪中  
械婦人往視之死其慘毒多此類

宋史

乳虎韓鎮字玉汝神宗時知秦州嘗宴客夜歸指使傳  
勅被酒誤隨入州宅與侍妾遇鎮怒令軍校以鐵累杖  
箠殺之勅妻持血衣搗登聞鼓以訴坐落職分司南京  
秦人語曰寧逢乳虎莫逢玉汝

上

黑殺李稷字長卿神宗時為陝西轉運使秦民作舍道傍者創使納侵街錢一路擾怨與李察皆以苛暴著稱時人語曰寧逢黑殺莫逢稷察

史

諂佞

四其張疎為劉嘉作奏曰今天下聞劉崇之反也咸欲搦衣手劒而叱之其先至者則拂其頸衝其胷刃其軀切其肌後至者欲撥其門仆其牆夷其屋焚其器應聲倒地則時成創而宗社尤甚言必切齒焉何則以其背



畔恩義而不知重德之所在也

王莽傳

郭霸初舉集召見

于則天前自陳忠鯁云往年征徐敬業臣願抽其筋食其肉飲其血絕其髓則天悅拜殿中侍御史時人號為

四其御史

唐舊

義孝和士開母喪託附者咸往奔哭鄴中富商丁鄒嚴興等並為義孝有一士人亦在哭限封孝琰人弔出謂人曰嚴興之南丁鄒之北有一朝士號叫甚哀聞者傳之士開知而大怒

北史

嘗藥和士開用事人多附之有一人士曾參士開病醫者云須服黃龍湯士開有難色參曰此湯甚易王不須疑惑請先嘗之一舉而盡士開深感其意為之強服遂

得汗病愈

精世說

嗅膿趙元楷為交河道行軍大總管時侯君集為元帥君集馬病舛顛元楷以指露其膿而嗅之以諛君集為

御史所劾左遷括州刺史

談賓錄

譽樹太宗嘗指一樹下曰此嘉樹宇文士及從而美之

不容口太宗正色謂之曰魏徵嘗勸我遠佞人我不悟  
佞人為誰矣意常疑汝而未明也今及果然士及叩頭  
謝曰南衙羣臣面折廷事陛下常不舉手今臣幸在左  
右若不少順從陛下雖貴天子復何聊乎太宗怒乃解

大唐  
新語

以身代犧武后有疾詔遍祭神廟以祈福消災閭朝隱  
詣少室山時為給事中因親撰祝文以身代犧沐浴伏  
於俎盤令僧道迎至神所觀者如堵會后疾愈特加賞

賁左司郎中張元一畫代犧圖以進后大笑雖厚賜然

亦鄙其為人

易齋  
笑林

嘗便液郭宏霸再遣右臺侍御史大夫魏元忠病僚屬  
省候宏霸獨後入憂見顏間請示便液即染指嘗驗疾  
輕重賀曰甘者病不瘳今味苦即當愈矣喜甚元忠惡

其媚暴語于朝

舊唐

承鑑天后時張友誦事薛師掌擎黃幘隨薛師後于馬  
旁伏地承薛師馬鑑侍御史郭霸嘗來俊臣冀穢宋之

問捧張易之溺器並偷媚取容實名教之罪人也

金載

舐痔折肢太子少保薛稷雍州長史李晉中書令崔湜  
蕭至忠岑義等皆外飾忠鯁內藏諂媚脅肩屏氣而舐  
痔折肢阿附太平公主十月三日家破身戮

上

背挽犢車趙履溫為司農卿折支勢族舐痔權門諂容  
安樂公主為公主奪百姓田園造定昆池言定天子昆  
明池也用庫錢百萬億斜褰紫衫為公主背挽金犢車  
險詖皆此類誅逆韋之際上御承天門履溫詐喜舞蹈

稱萬歲上令斬之刀劍亂下與男同戮人割一脛骨肉俱盡上

嗅靴鼻張說前為并州刺史諂事特進王毛仲餉致金寶不可勝數後毛仲巡邊會悅于天雄軍大宴酒酣恩勅忽降授兵部尚書同中書門下三品說拜謝訖便把毛仲手起舞嗅其靴鼻上

為人哭母將軍高力士特承立宗恩寵遭母喪在金吾大將軍程伯獻少府監馮紹正二人直就力士母喪前

披髮而哭甚於已親朝野聞之不勝其笑上

省疾涕泣成敬奇為大理正與姚崇有姻親崇嘗感疾  
敬奇造宅省馬對崇涕泣懷中置生雀數頭乃一一持  
出詩手執而後放之祝云願令公速愈也崇勉從之敬  
奇既出崇惡其諛媚謂其子弟曰此淚亦從何而來自

茲不復接遇

唐新語御  
史臺記

阿蒼竇懷貞傾巧進用累遷晉州長史諂事中貴盡得  
其歡心韋庶人乳母王氏本蠻婢也懷貞聘之為妻封

莒國夫人俗為妳母之聿曰阿奢懷珍每因謁見及進  
奏表狀列其官次署曰翊聖皇后阿奢時人鄙之呼為  
奢懷貞欣然其得韋庶人敗遂斬其妻持首其獻居憲  
臺及京尹每視事見無鬚者誤以為中官必曲加承接  
至有士人無鬚而懷貞誤為之禮者睿宗踐祚懷貞位  
極人臣道諛不悛以至放貶光天中玄宗戡內難懷貞

投水死

唐新語

封還詔書敬宗時李逢吉用事私怒龐嚴遠貶之於赦



為給事中封還詔書時人以為觸宰相之怒以辨朋友  
之非辜其仁大矣及駁奏出乃是論貶嚴大輕中外無  
不大噓教即遷工部侍郎

通鑑

來蘇隊杜邠公守揚州耽於游宴宣宗除崔鉉為代以  
詩送之曰一方獄市獲來蘇揚州押衙傳希聞御詩即  
教習來蘇隊舞以迎崔公杜頗銜之至歸洛每遇維揚  
人必問曰來蘇健否謂傳希

金華子

善佞大厯中荊州有馮希樂者善佞見人見鼠穴亦佞

常到長林謁縣令留宴語令云仁風所感猛獸出境昨  
初入縣界虎狼相尾西去有項村吏來報昨夜有虎食  
人令戲詰之馮遠曰是必掠食便過

上

得寶歌詞韋堅廣運潭成陝縣尉崔成甫作得寶歌詞  
白衣缺膊綠衫錦半臂偏袒膊紅羅抹額於第一船作  
號頭唱之婦人百餘人和之

續世說

滑八中書主簿滑渙與內官典樞密劉光琦相通宰相  
議事與光琦異同者令渙達意未嘗不遂所欲宰相杜

佑鄭綱皆姑息之佑呼為滑八上

父事內官崔元畧戶部侍郎出於宣授時諫官有疏指  
言內侍崔潭峻方有權寵元畧以諸父事之元畧上章  
自辯上詔荅云朕所命官奚恤人言然終不能逃父事

內官之名上

五父李輔國權威宰相李揆山東甲族位居台輔見輔  
國執子弟之禮謂之五父上

盡日筆蘇脩莊宗將即位張承業意未欲莊宗遽攝尊

號人亦無敢贊成者循自河中來入衙城見府廨即拜  
謂之拜殿見莊宗即呼萬歲舞并泣而稱臣翌日又獻  
大筆三十管謂之畫日筆莊宗大悅承業深惡之

上

十德啟鍾傳起於商賈尤重學士諸葛浩因擇其行事  
赫赫者十條形於啓事以投之謂之十德啓凡五千字

傳驚嘆每一字以一千錢酌之凡五千緡

五代  
史補

白玉蓮盃嘉祐中有王永年者娶宗女求舉于竇卞楊  
繪得監金耀門書庫永年嘗置酒延卞繪出其妻間坐

妻以左右手掬酒以飲卞繡謂之白玉蓮花盃

史

九章錫韓侂冑用事時其誕日高似孫獻詩九章每章用一錫字辛棄疾以詞贊其用兵則用司馬昭假黃鉞

異姓真王故事

宋史

朱萬拜賈似道柄國時折漕朱浚每有劄子稟事必稱其萬拜覆時人謂之朱萬拜浚晦翁曾孫也

蘇軾記

簡傲

傲世主曾子謂子思曰昔者吾從夫子巡守於諸侯夫

子未嘗失人臣之禮而猶聖道不行今吾觀子有傲世  
主之心無乃不容乎子思曰時移世異人有宜也當吾  
先君周制雖毀君臣固位上下相持若一體然夫欲行  
其道不執禮以求之則不能入也今天下諸侯方欲力  
爭競招英雄以自輔翼此乃得士則昌失士則亡之秋  
也及於此時不自高人將下吾不自貴人將賤吾舜禹  
揖讓湯武用師非故相詭乃各時也

孔叢  
子

貧賤驕人田子方之魏魏太子從車百乘而迎之郊太

子再拜謁田子方田子方不下車太子不說曰敢問何如則可以驕人矣田子方曰吾聞以天下驕人而亡者有矣以一國驕人而亡者有矣由此觀之則貧賤可以驕人矣夫志不得則投履而適秦楚耳安往而不得貧賤乎於是太子再拜而後退田子方遂不下車

韓詩外傳

分坐趙壹字元叔恃才倨傲為鄉里所擯光和元年舉郡上計到京師是時司徒袁逢受計計吏數百人皆拜伏庭中莫敢仰視壹獨長揖而已逢望而異之令左右

往讓之曰下郡計吏而揖三公何也對曰昔酈食其長  
揖漢王今揖三公何遽怪哉逢則飲杜下堂執其手延  
置上坐因問西方事大悅顧謂坐中曰此人漢陽趙元  
叔也朝臣莫有過之者吾請為諸君分坐坐者皆屬觀  
漢後

弄泰十月朝黃祖在矇衝船上大會賓客設泰臠禰衡  
年少在坐泰臠至衡先自飽食都不顧衆賓唯舉搏以  
弄戲時江夏有張伯雲亦在坐調之曰禮教云何而食



此正平不答弄泰如故祖曰處士不當答之也衡謂祖  
曰君子寧聞車前馬橫祖呵之衡熟視祖罵曰死鍛錫  
公祖大怒令五伯將出欲杖之而罵不止遂令絞殺黃  
射來救無所復及悽愴流淚曰此有異才曹操及劉荊  
不殺大人奈何殺之祖曰人罵汝父作鍛錫公奈何其  
不殺

別傳

兵子張飛嘗就劉巴宿巴不與語飛遂忿恚葛亮謂巴  
曰張飛雖實武人敬慕足下主公今方收合文武以定

大事足下雖天素高亮宜少降意也巴曰大丈夫處世當交四海英雄如何與兵子共語乎輔吳將軍張昭嘗對孫權論巴褊阨不當拒張飛太甚權曰若令子初與世沉浮容悅立德交非其人何足稱為高士乎

零陵先賢傳

獨榻簡雍字憲和少與先主有舊隨從周旋為昭德將軍優游風儀性簡傲跌宕在先主坐席猶箕踞傾倚威儀不肅自縱適諸葛亮已下則獨擅一榻項枕卧語無所為屈

蜀志

不交后鍾士李精有才理先不識嵇康鍾要於時賢偽之士俱往尋康康方大樹下鍛向子期為佐鼓排康揚槌不輟傍若無人移時不交一言鍾起去康曰何所聞而來何所見而去鍾曰聞所聞而來見所見而去

世說

題鳳嵇康與呂安善每一相思千里命駕安後來值康不在喜出戶延之不入題門上作鳳字而去喜不覺猶以為欣故作鳳字凡鳥也

上

安嘗從康或遇其行康兄

喜拭席而待之弗顧獨坐車中康母就設酒食求康兒

共語戲良久則去其輕貴如此

晉記

輕府主孫楚字子荆才藻卓絕典邁不羣多所陵傲缺鄉曲之譽後叅石苞驃騎軍事楚既負其材氣頗侮易於苞初至長揖曰天子命我叅卿軍事因此而嫌隙遂構初叅軍不敬府主楚既輕苞遂制施敬自楚始也

晉書

馬曹王子猷作桓沖騎兵叅軍蓬首散帶不綜知府事桓問曰卿何署答曰不知何署時見牽馬來似是馬曹桓又問官有幾馬答曰不問馬何由知其數又問馬北

死多少答曰未知生焉知死

世說

慧業太守孟顓事佛精懇而為謝靈運所輕嘗謂顓曰  
得道德須慧業丈人生天當在靈運前成佛必在靈運  
後顓深恨此言又與王宏之諸人出千秋亭飲酒保身  
大呼顓深不堪遣信相聞靈運大怒曰身自大呼何礙

癡人事

南史

司隲謝超宗為南郡王中軍司馬人問曰承有朝命定  
是何府超宗怨望答曰不知是司馬為是司隲既是隲

府政應為司驢為有司奉以怨望免禁錮十年

工

卧不即起張敦永初初遷秘書郎嘗在省直中書令傅亮貴宿權要聞其好學過候之敦卧不即起亮怪而去

宋書

性不耐雜江夏王義恭就文帝求一學義沙門會敦赴假還江陵入辭文帝令以後車載沙門往謂曰道中可得言晤敦不奉詔曰臣性不耐雜上甚不悅

南史

為異王融假還鄉詣王儉別儉立此地舉袂不前融亦

舉手呼儉曰歎曰王前儉不得已趨就之融曰使融不  
為慕勢而今君為趨士豈不善乎常歎云不恨我不見  
古人所恨古人又不見我融與吏部尚書何戢善往詣  
戢誤通尚書劉澄下車入門乃曰非是至戶望澄又曰  
非是既造席賜澄曰都自非是乃去其為異如此

上

登榻王瞻字明遠負氣傲俗好貶裁人物仕宋為王府  
叅軍嘗謁劉彥節直登榻曰君侯是公孫僕是公子引  
滿促膝唯余二人彥節不悅

續世說

焚床黃門郎路瓊之太后之兄慶之之孫也與王僧達  
隣居盛束服以謁僧達僧達不與語謂曰身昔門下駿  
路慶之者是君何親遂焚瓊之所坐床太后怒涕泣訴  
於孝武帝帝曰瓊之年少無事謁王僧達見辱乃其宜  
爾

上

搗扇蕭子顯自負才氣為吏部尚書見九流賓客不與  
交言但舉扇一搗而已衣冠竊恨

上

投情卜延之為上虞令有剛氣會稽太守孟巖以令長



我之積不能容脫幘投地曰我所以屈者政為此幘爾  
今已投之鄉矣卿以一世勲門而傲天下國士拂衣而  
去上延之彬父也續世說作彬誤

輕蔑朱异輕傲朝賢不避貴戚人或誨之异曰我寒士  
也遭逢以至今日諸貴皆恃枯骨耳輕我下之則為蔑  
尤甚我是以先之上

凌忽劉孝綽仗氣負才多所凌忽每於朝集會同公卿  
間無所與語反呼駙卒訪道途間事上

酒幸得陪吳興吳規頗有才學邵陵王綸引為賓客深相禮遇及綸作牧郢藩規隨從江夏遇張讚出之湘鎮路經郢服綸餞之南浦讚見規在坐意不能平忽舉盃曰吳規此酒幸汝得陪今宴規尋其還其子翁孺見父不悅問而知之翁孺因氣結爾夜便卒規恨讚慟兒憤病兼至信次之間又致殞規妻深慟夫子翌日又亡時人謂張讚一盃酒殺吳氏三人其輕傲皆此類也

上

鮑通直鮑泉為通直侍郎嘗乘高憶車從數十轍蓋服

玩甚精道逢國子祭酒王承承疑非舊貴遣訪之泉從  
者答曰鮑通直承怪焉復欲辱之遣逼車追鮑通直復  
是何許人而得如此都下少年遂為口實見尚豪華人  
相戲曰鮑通直復是何許人而得如此以為笑謔

上

不與鴈行庾革子喬為荊州別駕時元帝為荊州刺史  
而州人范興話以寒賤仕叨九流選州主簿又以皇太  
子令及之故元帝勅喬聽興話到職及屬元日府州朝  
賀喬不肯就列曰庾喬忝為端右不能與小人范興話

為雁行元帝聞乃進喬而停輿詰羞慚還家憤卒<sub>上</sub>

父藝陳暄慶之子也文才逸俊嗜酒無節陳太康中徐陵為吏部尚書精簡人物搢紳之士皆嚮慕焉暄以玉帽簪挿髻紅絲布褕頭袍拂踝靴至膝不諫爵里直上陵坐陵不之識命吏持下暄徐步而出舉止自若竟無忤容作書謗陵陵甚病之後主即位侍遊宴為狎客甚親昵而輕侮之嘗倒懸於渠臨之以刃而傲弄轉甚後主稍不能容遂縛父為帽加於其首火以焚之然及於

髮垂泣求哀而弗之釋柳莊矯敕之敕引出經數日暄  
發悻而死<sup>上</sup>

獨食崔瞻字彥通性簡傲以才地自矜所與周旋皆一  
時名望在御史臺恒宅中送食備盡珍羞別食獨食處  
之自若有一河東人士姓裴亦為御史伺瞻食便往造  
焉瞻不與交言又不命匕筋裴坐觀瞻食罷而退明日  
自攜匕筋恣情飲噉瞻謂曰我初不喚君食亦不共君  
語遂能不拘此節昔劉毅在京口冒請鵝炙豈亦異是

君定名士於是每與之同食

北史

署戶崔鑣字岐叔少與范陽盧思道同志友善每以讀書為務負恃才地大署其戶曰不讀五千卷書者無得入此室為散騎常侍聘陳還以聲常得無事一醉輒入日越國公楊素時方貴幸重鑣門地為子玄縱娶其女為妻聘禮甚厚親迎之始公卿滿坐素令騎迎之儼敝衣冠騎驢而至素推令上坐儼禮其侶言又不避素忽然拂衣而起竟罷坐後數日儼方來謝素待之如初詔

授易州刺史或言其未合乃追停僦語人曰易州刺史何必勝道義上

投詩於江鄭世翼弱冠有盛名數以言辭忤物稱為輕薄時崔信明矜其門第頗蹇傲自伐多所凌轢常賦詩吟嘯自謂文章獨步過於李百藥世翼遇諸江中謂之曰嘗聞楓落吳江冷信明欣然示有餘篇世翼覽之未終曰所見不如所聞投之於江信明不能對擁襪而去

唐 舊

不喜拜揖王績性簡傲刺史崔喜請相見曰奈何坐召

嚴君平耶杜之松請講禮曰吾不能揖讓邦君門

新唐

見判羞死杜審言甫之祖也恃才褻傲為時輩所嫉乾

封中蘇味道為天官侍郎審言預選試判訖謂人曰味

道必死人問其故審言曰見吾判自當羞死矣又嘗謂

人曰吾之文章合得屈宋作衙官吾之書跡合得王羲

之北面其矜誕如此

舊唐

續世說乾封作登封何氏語林因之俱誤



替人杜審言與李嶠崔融蘇味道為文章四友將死時  
語宋之問武平一曰吾在久壓公等今且死固大慰但

恨不見替人

新唐

人瑞鄭仁表泊之子也文章尤稱俊拔然恃才傲物人  
士薄之自謂門第人物文章俱美嘗曰天瑞有五色雲  
人瑞有鄭仁表劉鄴少時投於泊仁表

上

通未鄴為宰相仁表竟貶死南荒

上

傲詰宣皇好微行溫庭筠遇於逆旅溫不識龍顏傲慢

而詰之曰公非長史司馬之流帝曰非也又曰得非六

恭簿尉之類帝曰非也謫為方城尉

北夢  
瑣言

脚來筆羅隱恃才傲物落第契濶東歸黃冠事平朝賢

議欲官之羅胎範沮之曰某曾與之同舟而載雖未相

識舟人告曰此有朝官羅曰是何朝官我脚夾筆可以

敵得數輩必若登科通籍吾徒為糝糠也由是不果召

上

天中記卷二十八